

摛藻堂四庫全書薈要

集部

欽定四庫全書叢要

集部

中州集卷六

詳校官候選知縣臣吳南華



欽定四庫全書叢要卷二萬七十九集部

中州集卷六 己集

金元好問輯

馬內翰璧 一十五首

璧字叔獻別字天粹承安二年進士歷州縣召入翰林再為曹郎宣宗朝屢以使指鞫大獄權貴如歸德知府宿州總帥聲勢焰焰朝廷知其跋扈而不能摧伏者叔獻以法臨之毛髮不貸

也幼有重名就所長論之館閣臺諫與賓客言
乃其選也徒以小心奉法不畏彊禦故屢以城
旦書屈之識者有用違其長之歎興定末以同
知集慶軍節度使事致仕居崧山龍潭者十餘
年諸生從之游與四方問遺者不絕賦詩飲酒
放浪山水間人望以為神仙焉山中多蘭每中
春作華山僧野客人持數本諸公以香韻清絕
為勝少劣則有罰謂之鬪蘭所釀松醪東坡所

謂歎幽姿之獨高者惟叔獻能盡之客有以京
國名酒來與之校者味殊不能近正如深山草
衣木食人語覺傭兒販夫塵土氣為不可嚮也
是後松醪鬪蘭遂為山中故事叔獻少日在太
學賦聲籍甚其學長於春秋詩筆清峻似其為
人字畫楚楚有魏晉間風氣雅為閒閒公所激
賞制誥典雅當代少見其比尺牘又其專門之
學風流蘊藉不減前世宋景文左丞董公紹祖

奉使江左得其詩餞行喜見顏間詩四韻每誦一句輒為一舉觴李右司之純談笑此世為不足玩見叔獻則必為之懼然王延州從之公於鑒裁為海內稱首敬其名德至不敢以同年生數之北渡還鄉里年七十九終於家墓碑云所貴於君子

者三曰氣曰量曰品有所充之謂氣有所受之謂量氣與量備而才行不與存焉本乎才行氣量而絕出乎才行氣量之上之謂品品之所在不風岸而峻不表襮而著不名位而重不耆艾而尊是故為天地之美器造物者斯固之不輕以予人間百千萬人之衆歷數十百年之久乃

一二見之同乎其時非無孤雋偉傑之士從容
於禮文之域角逐乎功名之地惟其俗不可以
為雅劣不可以為勝故自視缺然陳太丘事業
無聞而名重天下房次律坐鎮雅俗而舉世以
王佐許之施之當時未必適用然千載而下有
為之歛誰者非品何以得之元光正大以來天
下大夫士論公平生者蓋如此

子渭字清甫以門資叙仕為密

院機察清慎而文天下有馮孝子之目今居鎮陽
同裕之再過會善有懷希顏

寺元魏離宮十日來凡兩前與舅卿偕齋奠少林往其
時已薄暮諸勝不暇訪今同魏諸孫再到風烟上寺僧

尊升殿雄深肅瞻仰柱礎門限砧追琢成大壯不見磨琢
痕瑩滑明滉朗摩挲三歎息後世無此匠晚登西南亭碧
玉對千丈如王官天柱如太華仙掌留宿贊公房秀色夢
餘想夜靜耿不眠泉溜琴筑響惜鬢今不來聯詩共清賞

和希顏

虎守天門未易通庾塵無扇障西風主人何負盜憎主
公論不明私害公老伏固非千里驥冥飛似是五噫鴻
紛紛往事渠知幾都付崧巔一笑中

送國醫儀師顏企賢得請歸闕中次朝賢韻

心平窮富恐欺天面有陰功蓋有年歸去青山仁者樂
祕來丹訣老而傳尚醫冗食渠百輩公論共推君十全
技道精微仍遠引就非輕舉亦幾仙

河山形勝圖

書劍丁年記昔遊中條之麓過蒲州地形西控三秦遠
河勢南吞二華秋晉魏兵爭一春夢漢唐壇祀幾荒丘
披圖弔古令人慨不必重登鶴雀樓

雒帥覓蘭作詩以寄

雲挿高牙畫戟新春移寶檻燕堂深水南紅藥初退舍
嵩麓芝蘭今嗣音璽足頰肩坐香累高梁華棟豈渠心
使君有問花應語玉樹誠佳非故林

明皇擊梧桐圖

三郎耳譜趁花奴風調才情信有餘天寶錯來非一拍
霓裳中節亦區區

送人出使

陽春有脚蘿疲瘵水鏡無心照潔汙九道澄清天意切
人才一一似君無

習池醉歸圖

襄漢方屯十萬兵習池日往不曾醒紛紛悞晉皆渠輩
何獨王家一寧馨

東坡海南烹茶圖

講筵分賜密雲龍春夢分明覺亦空地惡九鑽黎洞火
天游兩腋玉川風

陰晦中忽見華山

吏部能開衡嶽雲坡仙曾借海宮春蓮峯清曉忽自獻
二公何人予何人

草堂春暮橫披

遷客倚樓家萬里五陵飛鞚酒千金草堂澹與春山對
幽鳥一聲春已深

元光間予在上龍潭每春秋二仲月往往與元雷
游歷嵩少諸藍禪師汴公方事參訪每相遇輒

揮毫賦詩以道閒適之樂今猶夢寐見之兒子
渭近以公故抵任城禪師附寄詩以叙疇昔未
幾駐錫東菴因造謁間出示裕之數詩醉筆縱
橫亦畧道嵩遊舊事感歎之餘漫賦長句二首
性理諸方已徧參歸來一錫駐東菴山中蓮社舊招隱
旅舍阿戎新對談詩筆如君僧有幾文章媿我老無堪
綾書大字拈香疏須趁微之酒半酣

又

少林脩竹欲天參
竹外幽閒草結庵
顧我雖存惟白髮
與君曾共此玄談
干戈橫絕境猶夢
草樹荒殘人豈堪
觴甕春醪鬢莫預
商歌悲壯不能酣

雨後看竝玉所控諸峯

竝玉如高人壁立九千仞
一日不見之令人生鄙吝春
深木葉敷秀色益濡潤結茅寄僧藍
晴碧時得趁老宿
詫孫峯隅侍到韶齡連延青一色
枚數須諦認溟濛空
翠間我亦疑未信朝來雲氣昏
埋沒瑜匿瑾如蒼梧政

愁湘妃鬱思舜重陰俄解駿靈霧夕暉觀娟娟忽層出歷
歷分遠近雲峯玄吞吐千狀繞一瞬出奇如孫吳相降如
廩闈如衆星拱辰如侯伯入覲接武如朋簪承迎如介儔
負固如吳楚爭長如齊晉怪詭如夷蠻駢羅貢琛責窘蹙
如擒獲係纍將就釁如應龍神靈蟄臥時奮迅如天駟超
軼坰牧脫羈韁如雄對改容失箸駛疾震如猛士無譁攢
槊俟嚴陣獨兩峯巍然魁傑儼崇峻光輔岳柱天鬱為中
興鎮降生申與甫周室債復振詩傳配崧高百世磨不磷

同希顏怪松

崧高地氣靈花木競妍秀玉峯西南趾有松獨怪陋偃
蹇如蟠螭奮迅如攫獸葉勁須髯張皮古鱗甲皴菌蠹
藤癭怒支離筇節瘦月上虬影搖風度雨聲驟子落慰
枯禪枝樛礙飛鼯盤根萬乘器平蓋千歲壽樵斤幸免
尋廈匠矧肯構龍化會有時天旱期汝救

王內翰若虛

三十八首

若虛字從之橐城人承安二年經義進士少日

師其舅周德卿及劉正甫得其論議為多博學強記誦古詩至萬餘首他文稱是善持論李屏山杯酒間談辯鋒起時人莫能抗從之能以三數語室之使噤不得語其為名流所推服類此釋褐廊州錄事歷門山令入翰林自應奉轉直學士居冷局十五年崔立之變羣小獻謠為立起功德碑以都堂命召從之從之外若遜辭而實欲以死守之時議稱焉北渡後居鄉里癸卯三月東游與劉文季

輩登泰山憩於黃峴峯之萃美亭談笑而化時
年七十從之天資樂易負海內重名而不立崖岸
雖小書生登其門亦折行輩友之滑稽多智而
以雅重自持謀事詳審出人意表人謂從之於
中外繁劇無不堪任直以投閒置散故百不一
試耳自從之沒經學史學文章人物公論遂絕不
知承平百年之後當復有斯人否也予恕字寬夫

憾憤

非存驕蹇心非徼正直譽浩然方寸間自有太高處平
生少諧合舉足逢怨怒禮義初不愆謗訕亦奚顧孔子
自知明桓魋非所懼孟軻本不逢豈為臧氏沮天命有
窮達人情私好惡以此常泰然不作身外慮

贈王士衡

王生非狂者乃以善哭稱每至欲悲時不間醉與醒音
詞初惻愴涕泗隨縱橫問之無所言坐客笑且驚王生
不暇卹若出諸其誠嗟我與生友此意猶未明絲染動

墨悲麟亡傷孔情韓哀峻嶺陟阮感窮途行涕流賈太
傅音抗唐衢生古來哭者多其哭非無名生其偶然歟
何苦摧形神如其果有為為爾同發聲

貧士歎

甌無塵瓶無粟北風蕭蕭吹破屋入門四顧何淒涼稚
子低眉老妻哭世無魯子敬郭元振之真丈夫故應餓
死填坑谷蒼天生我亦何意蓋世虛名食不足爭如只
使冗且愚大腹便便飽梁肉

感秋

西風撼庭柯疏葉鳴桀桀天地一蕭條羈懷亦岑寂青
春悅如昨轉盼年半百自從長大來轉覺日月迫功名
非所慕老大不足恤怛然感時心自亦不能釋清晨理
短髮已見數莖白刀鐸雖可施殆似兒子劇此身委蛻
耳蝕棄無足惜況於毛髮間而乃強脩飾青青如陸展
星星行復出畢竟白滿頭復將何所摘

生日自祝

空囊無一錢羸軀兼百疾况味何蕭條生意渾欲失清晨
聞喧呼親舊作生日我初未免俗隨分畧脩飾舉觴聊自
祝醉語盡情實神仙恐無從富貴安可必脩短卒同歸何
足喜與戚一祈龐康強二願早間適衣食無大望但願了
晨夕萬事不我櫻一心常自得優游終吾身志願從此畢

失子

妍妍掌中兒捨我一何遽其來誰使之而復奄然去平
生三舉子隨滅如朝露顧我能無悲其如有天數自從

學道來衆苦頗易度有後固所期誠無亦何懼人生得
清安政以累輕故婚娶眼前勞託遺身後慮百年曾幾
何為此離稚悞顧語長號妻此理亦應諭

憶之純三首

幼歲求真契中年得偉人傾懷當一面投分許終身燈
火談玄夜闌花逐勝春何時重一笑曾次欲生塵

又

面目三年隔音書萬里遙宦途俱蹭蹬日事各蕭條志

大謀常拙身孤道易消本無當世用隱處會相招

又

雋氣輕天下高情到古人銜盃曼鄉放下筆老坡神時
論誰優劣人材自屈伸窮愁須理遣不必淚沾巾

復寄二首

志大言高與世違拂衣真作竹林歸黃塵道口風波惡
未必先生自處非

又

自笑趨塵亦強顏食謀未免敢言閒紫芝果可充飢腹
從子玉屏巖石間

病中二首

學道今何得謀生久不成藍衫幾棄物絳帳亦虛名事
拙應天意交疎即世情煩憂時自解感觸又還生

又

鬱鬱窮愁意營營久病身詩情渾欲減藥物但相親未
得驅窮鬼終須問大鈞三時勞慰拊甚愧故人真

感懷

枉却全家仰此身書生那是治生人百憂耿耿填胷臆
強作歡顏慰老親

自笑

酒得數杯還已足詩過兩韻不能神何須豪逸攀時傑
我自世間隨分人

別家

到了身安是本圖何須身外覓浮虛誰能置我無饑地

却把微官乞與渠

慵夫自號

身世飄然一瞬間更將辛苦送朱顏時人莫笑慵夫拙
差比時人得少閒

西城賞蓮呈晦之

晦之自號放公

舊賞回頭已隔年高花又見出新妍偶成濁酒狂歌會
恰及斜風細雨天樂事適來偏有興閒身常得分無緣
作詩莫怪多誇語差比放公先着鞭

題淵明歸去來圖五首

此下皆中
年所作

靖節迷途尚爾賒苦將覺悟向人誇此心若識真歸處
豈必田園始是家

又

孤雲出岫莫鴻飛去住悠然兩不疑我自欲歸歸便了
何須更說世相遺

又

拋却微官百自由應無一事挂心頭銷憂更藉琴書力

借問先生有底憂

又

得時草木竟欣榮頗為行休惜此生乘化樂天知浪語
看君於世未忘情

又

名利醉心濃似酒貪夫衮衮死紅塵折腰不樂翻然去
此老猶為千載人

翰長閒閒公命題城南訪道圖戲作二詩且為解

之云

得道由來不必勞癡兒舍父謾逋逃閒閒老子還多事時向招提打一遭

又

竹木蕭森蔭綠苔幽襟自愛北軒開主人無說吾何問乘興而來興盡迴

答鄭下辨禪師見戲代防禦高侯

酒肆淫房總道場偶然游戲亦何妨阿師自墮泥犁趣

更笑春風柳絮狂

還家五首

日日他鄉恨不歸
歸來老淚更沾衣
傷心何啻遼東鶴
不但人非物亦非

又

荒陂依約認田園
松菊存亡不足論
我自無心更懷土
不妨猶有未招魂

又

山杏溪桃化棘榛舞臺歌榭隨灰塵春來底事堪行處
門外流鶯枉喚人

又

回思夢裏繁華事幸及當年樂此身閒立斜陽看兒戲
憐渠虛作太平人

又

艱危嘗盡鬢成絲轉覺謹謹不可期幾度哀歌仰天問
何如還我未生時

山谷於詩每與東坡相抗門人親黨遂有言文首
東坡論詩右山谷之語今之學者亦多以為然
漫賦四詩為商畧之云

絕足由來不可追汗流餘子費奔馳誰言直待南遷後
始是江南不幸時

又

信手拈來世已驚三江袞袞筆頭傾莫將險語誇勍敵
公自無心與物爭

又

戲論誰知出至公
蝤蛑信美恐生風
奪胎換骨何多樣
都在先生一笑中

又

文章自得方為貴
衣鉢相傳豈是真
已覺祖師低一著
紛紛嗣法更何人

王內翰子端詩近來陡覺無佳思
縱有詩成似樂天
其小樂天甚矣漫賦三詩為白傅解嘲

功夫費盡謾窮年病入膏肓豈易鐫寄語雪溪王處士
恐君猶是管窺天

又

東塗西抹鬪新妍時世梳粧亦可憐人物世衰如鼠尾
後生未可議前賢

又

妙理宜人入肺肝麻姑搔背豈勝鞭世間筆墨成何事
此老胸中自有天

麻徵君九疇二十九首

卷之二

九疇字知幾莫州人三歲識字七歲能草書作
大字有及數尺者故所至有神童之目章廟召
見問汝入宮殿中亦懼怯否對曰君臣父子也
子寧懼父耶上大奇之弱冠住太學有聲場屋
間南渡後讀書北陽山中其詩云讀書空山裏
落月低巖幽山鬼語

夜半怪我非巢由又云壯士半凋落鐵花繡吳鈞

始以古學自力博通五經於易春秋為尤長少時有惡疾就道士學

服氣數年疾遂平又從究丘張子和學醫子和
以為能得其不傳之妙大率知樂於學也專故
所得者深飢寒勞苦人所不能堪者處之怡然
不以累其業也嘗為郾城張伯玉賦透光鏡欽
叔傳之京師趙禮部大加賞異貼壁間坐臥讀
之興定末府試經義第一詞賦第二省試亦然
簾試以脫悞下第知幾先有才名又連中甲選
天下想望風采雖牛童馬走亦能道麻九疇姓

名正大三年右相侯蕭公趙禮部連章薦知幾
可試館職乃賜廬亞榜第二甲第一人及第授
太祝權太常博士應奉翰林文字知幾天資野
逸高騫自便與人交一語不相及則逕去不返
顧自度終不能與世合未幾謝病去作詩工於
賦物如夏英公篆韻其詩云千狀萬態了不同
哭鬼號神自此始簡如危

義地工畫繁如神農日中市圓如有城乙鳥卵
方如姜嫄巨人履傾如怒觸不周山遡如逆上
蠶叢水積如女媧石未煉碎如昆吾瓦經毀蚩
尤旗張尾後曲黃帝鼎成足下峙五丈專車斷

禹戈九日橫天羿落矢流慕不去龍垂鼻銜書
忽來鳳挽鬚方相四目闢門闢夔牛一脰踔階
祀貌似心猜未必然及手植檜印章等詩可見
賴君注釋車南指

也字畫正書八分皆有功詩最其所長少時猶
失持擇近詩精深峭刻似其為人他文不及也
明昌以來以神童稱者五人太原常添壽四歲
作詩云我有一卷經不用筆寫成展開無一字
晝夜放光明合河劉滋文榮六歲有詩云鶯花
新物態日月老天公劉徵伯祥七歲被旨賦鳳

皇來儀新恩張漢臣世傑五六歲亦召入賦元

妃素羅扇畫梅云前村消不得移向月中裁其

後常隱居不出餘三人者皆無可稱道獨知幾

能自樹立一日名重天下者舊如閭閻公且以

徵君目之而不名也壬申歲遇亂卒年五十平

山常仲明之子德莖之小商橋傍近趙莊

賦伯玉透光鏡

太陰淪魄元不耀太陽分光成二曜嗚呼怪銅盜此幻

透影在壁與背肖奩開燿燿光走庭劃如剝犀乍脫鞘
泓澄秋落百丈潭疑有龍向天門跳秦娃漢婉化鴛土
寵雨恩雲埋鳳詔當年椒塗鑑桃李身後泉臺映蓬蘽
枕簟無情草木香笙歌不暖梟狐嘯髑髏一醜不再妍
不知持此將安照萬斛珠璣委俑人喚得偷兒成鬼剽
借問金椎一控時何如海上青蠅弔壽如金石佳且好
此銘此篆兩奇峭今誰子後巖誰先贏得細樞經蟻竅
千古繁華一夢醒恍然入手稱神妙丹砂闕紫翠羽青

萬金難買人年少君侯新自洛陽來玉臺人物今溫嶠
相看大笑古人癡收鏡入盒還自笑

跋范寬秦川圖

山水人傳范家筆畫史推尊為第一竭來因看秦川圖
天下丹青能事畢大山巖巖如國君小山鬱鬱如陪臣
大石盤盤社與稷小石落落士與民一山一形似爭長
一石一態如布軍想君胸中有全秦見錄削錄錄乃真
掌上長安近於目千樹萬樹生青春憶昔岐山鳳皇語

葱葱柞棫霑新雨。昆夷束手密須降。不見功勲見歌舞。
黃金鑄牛西入棘。五丁雲棧通中國。驪山宮闕九天高。
六處屏王走銜璧。不信詩書信法家。關東半被魚書惑。
盡卷圖籍亦大好。五十年先都一埽章邯董翳舉如毛。
沐猴冠委金陵道。北原兵自天而下漢室傾頽如解瓦。
祁山六出縱無功。渭水猶堪飲君馬。螭蟠老將骨未朽。
草付那能濟陽九。技養投鞭抵歲星。歸來鹿死何人手。
神武空矜賀六渾。投機常落周人後。竟令馮翊軟沙邊。

東風一夜吹新柳
侵尋阜角相料理
拋擲龍津浮汴水
鷁頭過處已非隋
不覺晉陽人姓李
華清高宴戛宮梧
舞馬如何護兩都
縱得青驃還蜀道
肉得沙場白骨無
興亡自取不足吁
可憐神州為盜區
貪徵往古山川事
忘却題詩賞畫圖

松 笠 同 希 顏 欽 叔 裕 之 賦

犧尊青黃災木命
羈絆剪剔傷馬性
折松為 笠 得之天
此君幸免牋殘橫
初緣形似有代無
不料竒功乃差勝

人間斤斧不須勞坐中活火鳴笙簫千秋蟄骨養霜雪
一日奮羸翻雲濤巖烟繫拂殿雷起顛風蹴踏銀山高
莫嫌勺水懦無力如捲西江都一吸借汝歲寒姿扶我
衰朽質埽除幻夢不到眼洗刷埃霾下胸臆捫霞直與
羨門期一笑桑田海波白

竹癭冠為李道人賦

東方有物字豐隆以鳴為職驅羣聾萬頭戢戢囚凍窟
欲出不出愁天公迴寒作暖出一噫黑帝不敢藏昆蟲

所以獨為六字長揮斥元氣周神功車轟鼓震頃萬里
六甲風雲隨喚起四陰用事合收聲猶奮狂陽鳴不已
號令非時遭物玩草木不凋花再蕾惄得司秋訴帝閻
漏洩機緘法當死天公大怪下桎梏推落車中墮巖谷
非程非馬亦非人化作蒼筤一枝竹勁氣剛風難遽銷
夜聞風雨猶蕭蕭聳身直上三千尺天公又怪千雲霄
鬼魘神縛不聽出只見白雲鎖三白雲散惟餘青屈盤
頤隱於臍變仙質道人真是萬物盜斫取為冠就天巧

秋霜爭敢上頭顱常與春風同醉倒此冠固奇惜未大
有冠獨在方之外日月為藤織四時烟霞為撲綿千載
天潢絕漢梁虛碧北斗旋衡簪沆瀣不隨脂粉侶狻猊
不逐風霜陪獬豸一任旋乾復轉坤頭上峩峩終古在
欲作檀那施此冠不識先生若為戴

彈琴懷山中人

門前雪垂垂室中理朱絲手按十三徽心飛天一涯故
人渺何許萬里驚鴻飛試憑朱絲語一聲聲亦悲一彈

雪欲落再彈雪正作只在此山中故人今憂樂我欲彈
文王岐山雲渺茫我欲鼓曾子無田可耘耔道遠望不
及千山復萬水思君復思君正恐須鬢皤若不來
奈此宮商何春風早晚起百鳥喧庭柯時攜一尊酒為
君奏雲和

夏日

亭柯碧合龍蛇影睡起轆轤鳴曉井一簾曉雨捲不晴
槐花滿地黃金冷屈指西風又到門相思團扇欲生塵

何時萬戶垂楊裏高掛金鞭逢故人

牛歎

誰憐宿料一生無身後仍遭金十奴惟蓋却教蒙狗馬
不知何事負農夫

清明

村村榆火碧烟新拜埽歸來第四辰城裏看家多白髮
遊春總是少年人

暮春山家二首

山烟向晚白濛濛人過梨花樹底風一犬不鳴村徑黑
野燈孤起遠林中

又

語闌壯氣欲消磨奈此青燈永夜何壁上取琴彈一曲
不知天外落銀河

手植檜印章

梁折山摧入小成日華留得寸暉明不盈一握空蟲篆
未喪斯文麌姓名草木四周朝有暮圖書東觀死猶生

二千年後司封紐未信裁時出此情

贈裕之

向來三度見君詩常望西山有所思誰料并州天絕處
相逢梁苑雪消時賢人樂古聲猶在鼇叟文高世豈知
只恐神嵩不留客秦川如畫渭如絲

秋懷

江山如畫衣冠盡蒲柳無情宮殿秋亦用此韻者也

昨夜新涼御褐裘一番節物弄清愁月懸雙杵若為夜
人在一隅偏覺秋敗葉只能驚畫扇啼螢終不到朱樓

還鄉夢斷寒衾曉依舊雲山是蔡州

和伯玉食蒿醬韻

九尺東方生不如一侏儒飲啄各有程厚薄與生俱文
蒲及屈芟何乃淡以枯正如謝三旌甘心作羊屠伊蒿
本薪材豈足充庖厨薄雪草堂徑新霜古城隅河南地
差暖冬有不死蕪青來澗邊笞綠入几上盂微香能侶
菊小苦賢於荼酷烈變醯醢薰釀破脂酥書生喜倒說
食亦變精麌借問冰茶者何如羔酒乎況爾蓼彼蕭蓬

趺固其徒偶然蹣一等遽欲忘樵夫邇來歲頗饑大半
殣在途攘肉或至犬首丘不如狐命賤祇求死計窮交
議逋尚有紈袴兒朝夕食於株寧知歸野稗一飽不易
圖遂令人輕生不畏鑽與鉄如君有蒿醬猶是千金軀

復次韻二首

五臟太多可張頤託腥儒自非何曾家安得海陸俱莊
周幸有粟不至魚肆枯何勞夷門市下車朱亥屠春韭
與秋菘歲晚不供厨萬腹不萬目大方果無隅為醬非

負口猶勝范萊蕪。豈無青精飯駐顏炊一盂。豈無菖蒲
歇辟邪如神茶。又豈無椒花除瘟等。酴醿萬於數品中。
頗同武官麌數品雖異饌置之醬可乎。猶材各有施。豈
必皆吾徒公綽優為老劣於滕大夫大抵食如士取之。
非一塗君詩誌其味食經有董狐彼哉。龜羹指斲棺終
莫逋彼哉。萍蘚手竟死珊瑚株寧如醬以萬不出本草
圖。蓋後人好奇一洗腥砧鉄為謝饑崇鬼渠今離我軀。

又翌日又為履道所戲其意似欲窮吾技再和前章書呈伯玉

豈可為炙啖博哉。釋草儒奈何騷人詠不與蘭茝俱青。
青發陳荄嫩勝稀。生枯面柔似張禹氣。冽如申屠忍逢
易牙口。一日登君厨。君兄昔在日。作事太庶隅。宦游三
十年不治一室。蕪嘗載米之郡。政如置水盂。不義獲八
珍棄之猶董茶相對話。終日茗椀無鹽酥。見客惟恐遲
遇飯。不擇麌無食。但有名窮不亦宜乎。我本寒素士。臥
雪袁司徒臭味偶相似。豈是敦薄夫。見君食萬醬。取嘲
於仕途。和君萬醬詩。緼袍隨衣狐。詩醬兩情苦。此債無

由逋蒿荻無棄材奈此蒼松株何當列銅甕一依饗禮
圖唯聞廣廷樂不見轂門鉞此日雖無爵猶堪養羸軀
元裕之以山遊見招兼以詩四首為寄因以山中
之意仍其韻

石華政可採負我孤舟蓬胡為紅塵裏擾擾槐安宮山
間綠蘿月一照千巖空洪崖去不返清遊誰與同空餘
松根泉雜佩流無窮人心墮泥滓不如與天通舉頭視

霄漢浩露洗心胷

又

日月兩角蝟天地一粒粟老盆可徑醉豈擇瓦與玉大笑區中人朱門丐梁肉清曉登少室日夕眺王屋紫煙晞吾髮碧霞貯我腹溪中有白雲萬事付濯足物物愜幽情不獨蘭與菊

又

南風入桂樹高葉碧崢嶸舉手戲攀折上與雲烟撐黃金間白玉遍地先唱焚笙簫坐間發鸞鶴空中鳴浩歌

山谷應起舞衣裳輕一尊石一酒如我浩氣盈目送飛鴻盡青雲萬里平

又

國風久已熄如火不再然流為玉臺詠鉛粉嬌華年政
須洗妖治八駿踏芝田青苔明月露碧樹涼風天塵土
一一盡象緯昭昭懸寂寞抱玉辨爭競搖尾憐幸有元
公子不為常語牽

許方邨即事

聯句

披熱達許方山巔青漫漫野黃麥初割畦綠疏纏灌春
籬綠葉深巷樹春花亂煙長見新治風遠聞清鋸濯衣
女在溪販鐵人棲館牆危壘破石路黑沾遺炭山雲頃
剝雨沙地須臾暝鐸鳴駕犢耕罩密防雞散綠餘殘
挂釣罷么絲貫沽酒有客賒鬻李何人喚朴惄官始威
牒煩民更玩歷險小車多逢人黠衣半縣遠肉難求山
近寇可追何當卜隱居尋我杖藜伴

梁山宮圖

梁山宮高高切雲秦家簫鼓空中聞宮殿作雲王作龍
何人敢謁滻池君珠園翠繞窮天下道上行人衣半赭
不覺生靈血液枯化為宮上鴛鴦瓦朝盧生暮侯生師
事二人學羨門焉知以政藏其身神仙亦死何曾神空
能詐取六辱國不識盧生真間客種成間隙盧生去尚
令道士作鬼語祖龍竟隨此機中以璧見欺猶未悟魚
腥引得扛鼎來梁山火滅漢旗開何時後世丹青手一
夫不役千樓臺梁山之圖却傳世梁山之宮安在哉

跋伯玉命簡之臨米元章楚山圖

巴東峽壁如駁霞天鑿荆門當虎牙下有奔湍沉碧沙
直衝北固如投家雲煙昏曉互明滅朝看沃日暮吞月
遠山如指近如拳過客那知空一瞥高人廬此恨來晚
不厭孤蓬疊往返莫言造物好窮人許大乾坤富君眼
以心為鏡照諸山山如人面紛殊顏扁舟日日青山上
青山却在滄波間人道癡兒固貪取我怪高人亦如許
已將胸次注長江更把毫端扛巨楚齊列楓林葉浮舸

巧促魁梧入么麼丈尋收拾無邊春千里遊邀坐中我
自此頭吳尾甌越蠻烟五月髡人髮江山多處乃爾毒
始信中原天下甲楚山可覽不可上水氣昏昏且多恙
畫山縱不到真山有楚之峰無楚瘴靜明居士見山饒
想在菴中得飽參戲呼老李臨君畫已坐君貪我更貪

秋雨小霽湖陽道中

一雨初晴菊瘁花朝來啼殺報晴鴉地隣異域空懷古
人對殘秋更憶家十月紅爐是明日往年新火醉流霞

忿忿又上湖陽道何處還堪駐客槎

秋望

雲氣東南壯風煙正北長遠人投屋小寒草帶城荒馴鴨便秋潦飢牛背夕陽閒情儘堪畫未要雨浪浪

堂谿城南感寓

斷岸崩崖帶草長茂林高塏晚生涼田頭經水成駒臥雲色因風變狗蒼戰地尚餘唐壘柵故城曾入楚封疆牛童趁日貪捫蝨那解興亡事可傷

俳優

施能賣晉移君貳旃解譏秦救陸郎多少諫臣翻獲罪
却教若輩管興亡

李道人家山圖

見說高齋住太行溪山襟帶古祠堂圭桐葉落周家雨
鐵樹根盤晉國霜烽火不堪畔夜月畫圖猶可挂殘陽
自憐不及汾州鴈春去秋來過石梁

李道人嵩陽歸隱圖

城郭維崇井里維通冠蓋維錯紈綺維蕤云誰之子招
子歸嵩舍我箏筑樂彼潺淙食彼瓦缶遺我鼎鍾云誰
之子繪子歸嵩離人友鹿避俗朋松石齒我足泉瘦我
嘴龍吾恐時人笑子歸嵩有山有怪有水有龍盜出寇沒
囉兜咻熊吾恐狂人誑子歸嵩子謂吾言決意歸嵩歸
嵩何如如鴻避弋如鶴脫籠與幻俱化與化俱融是以
歸嵩南山重重翠如植葱北山隆隆紺如堆銅仰嵩俯
嵩雨濯雲烘嵩之為我我之為嵩我聞子言衣如張風

心先去鳥層雲盪胸靜言思之富為目萬貴為心蓬飾
說于令詎知任公歸嵩良是生龜脫筒子不歸嵩送子

歸嵩

陽夏何正卿作疊語四句未成章予復以疊語寄
之凡四變文

緼緼蠹蠹何等民矯矯亢亢內守貞昂昂藏藏獨異俗
落落莫莫不厭貧歸與歸與且餉口鳳兮鳳兮德哀久
樂云樂云無絃琴命乎命乎一杯酒匪鱠匪鮒故為藏

避言避世必也狂至大至剛秣吾馬爰清爰淨脩我牆
用之舍之時所係晉如摧如寧復計暖然淒然任春秋
優哉游哉聊卒歲

紅梅

一種冰魂物已尤朱唇點綴更風流歲寒未許東風管
澹抹濃粧得自由

劉御史從益 三十三首

從益字雲卿南山翁搃之曾孫大安元年進士

拜監察御史坐與當路者辨曲直得罪去久之
起為葉縣令脩學講義聳善抑惡有古良吏之
風葉劇邑也兵興以來戶減三之一田不毛者萬
七千畝其歲入七萬石故在也雲卿請於大農
為減一萬民賴之流亡歸者二千餘家未幾被
召百姓詣臺乞留不聽入授應奉翰林文字踰
月以疾卒時年四十四葉人聞之以端午罷酒
為位而哭且立石頌德以致哀思之心焉雲卿

博學強記於經學有所得為文章長於詩五言
古詩又其所長雷御史說雲卿在太學時年甚
少嘗有詩云黃金錯落雲間闕紅粉高低柳外牆
時輩皆推服之其卒以詩得名者固已見於此
矣雲卿詩如荒烟斜日村村晚哀柳寒浦岸岸
秋兩鄉留寓風薰面千里相望月滿樓子美
不妨衣露肘長鄉猶有賦凌雲春雪云千層寶
樓閣一片玉山川臨終云壞壁秋燈挑夢破老
梧寒雨滴愁生此類
甚多不能悉載也 有蓬門先生集行於世二

子祁字京叔郁字文季俱有名於時

題蘓李合畫淵明濯足圖

天機本自足人事或相須東坡畫三昧迺與龍眠俱黃
州富丘壑餘杭渺江湖已困口嘲弄更堪手糊塗其來
本游戲所到非功夫平生斜川翁尚友千載餘可聞不
可見風標定何如笑倩李居士為予巧形模臨流想有
詩滄浪元非漁不入聲利場政恐吾足汙二公有深意
百年留此圖不著色塵相澹然如遊天地初主人牢緘
膝丹青有渝此不渝

過尉氏懷阮籍

朝來國門遊暮抵蓬池宿有懷阮步兵豪氣無檢束嘯
歌陟高臺長風振林木老眼何曾青四海無一物萬古
留詩名九原銷醉骨居然方丈家惜也微瑕玉塗窮道
不窮先生安用哭

泛舟回瀾亭坐中作

昔年醉回瀾猶恨身屬官今年邂逅來身與亭俱閒洗
心亭下水照眼亭西山溪山如故人喜我復來還有酒

澆我胷有花怡我顏
羈鴈乍脫臂但覺天地寬
山陰忽回船夜闌情未闌

樂山松

樂山一何崇上有千歲松
清孤月露底秀拔天地中
蒲柳抱常質桃李開芳容
爭如十八公笑傲冰霜風
居然喜避世不肯汙秦封蟠
如北海螭伏如南陽龍紛紛過
者多匠石終不逢明堂幾時構
喚起蒼鬚翁

和淵明雜詩二首

俗士苦紛競此心本無塵功名迺外物了不關吾身吾
身復何有形神假相親天地開一室日月挟兩鄰有生
即有化如晏之必晨但得酒中了亦足稱達人揮戈欲
却日小力自不量何如任天運閉門坐齊芳詩書列四
隅著我於中央夏卧北窗風隆冬曝朝陽但有藜藿羹
亦足充飢腸

又

少為饑所驅老為病所迫人生能幾何東阡復南陌急

須沽酒來一笑舉大白浩歌草木振起舞天地窄同歡
二三子誰主復誰客浮沉大浪中畢竟歸真宅歲月去
何速老炎變新涼游子久不歸回首望大梁風埃慘如
此何處真吾鄉野菊明落日林楓染飛霜勸我一杯酒
悠然秋興長

和淵明始春懷田舍

家食自不惡菽水甘清貧學道未有得讀書亦良勤雖
勤竟何補俛首愧古人靜言閑世故來者日月新況復

抱沉疴百憂無一忻安得衛生訣益我華池津悅如一
夢覺不與萬法鄰野人借問我恐是劉遺民

和淵明飲酒韻

日入了公事援琴洗塵喧秋堂一燈明清響到夜偏彈
罷枕書臥渺然夢青山山英向我問君駕何時還家僮
忽喚覺惆悵不能言

臘日次幽居韻

世務方擾擾人生何營營不如不出門坐頤天地情泰

中有否來陰極即陽生掀髯一笑起窗外風鐸鳴看雲
偶獨立踏雪時間行最愛朝日升負暄向南榮

歲除夕次東坡守歲韻

人生都百年誰問鬪龜蛇容顏鏡中換老醜不可遮般
勤守此歲來歲復如何南鄰祭竈喧北里驅儺譁須臾
罷無為但聽樓鼓撾明朝四十過暮景真易斜初心自
慷慨白首還蹉跎寄語少年子雖健不足誇

次韻別歲

一日復一月其來不肯遲一冬復一春既去誰能追問
歲果安往懵不知津涯常於歲除夕知是相別時鄰翁
慣禮錢買酒烹鮮肥百挽不得留一別那須悲年年例
如此華髮吾何辭惟有學道心自覺老不衰

次韻餽歲

親朋餉無時鄰里歡有佐況當歲之終可以具百貨禮
意各示勤手段不妨大我貧無往還閉戶但高卧藜羹
且充腸珍味不登坐猶勝許文休衣食出馬磨自非揚

子雲載酒何人過空吟餽歲詩自歌還自和

清和即事用前韻

一度清明了一年溫風娟娟雨班班幾家繡憶尋芳去
何處蹇驢駛醉還宿草新墳驚世短落花流水占春閒
曉鶯啼破松牕夢缺月東南挂屋山

五月十四夜對月有感

世事易隨雲變滅人生難保月團圓淮陽旅舍三年夢
河朔風聲五月寒何處雲山端可老向來天地為誰寬

宦游脚底生荆棘蜀道而今却不難

再過郾城示伯玉知幾

三年兩度過潁陽鞍馬紅塵道路長花月不應知我老
溪山也解笑人忙朔風凜凜頻驚坐夜雨蕭蕭偶對床
他日水南營墓地愧無遺愛在桐鄉

次韻閒閒公夢歸

眉間喜色幾時黃滿貯羈愁著瘦腸萬里鄉關飛不到
十年歧路走空忙盃心蘸月松梢影鼻觀通風柏子香

最愛南山舊山色夢中相覓不相忘

題閒閒公夢歸詩後用叔通韻

學道幾人知道味謀生底物是生涯莊周枕上非真蝶
樂廣杯中亦假蛇身後功名半張紙夜來鼓吹一池蛙
夢間說夢重重夢家外忘家處處家

送儀提點西歸

自斷平生不問天拂衣歸去任吾年五侯鯖飽無多味
九老圖成又一傳回首京華瞻日遠放還鄉社得天全

綸巾醉卧咸陽市始信人間有散仙

再賡

人定端能坐勝天刀圭有力制頽年道非出世頭頭是
丹不遺經口口傳陰魄沉迷終鬼錄陽精飛鍊即神全
三山縹渺誰能到目下身安亦是仙

次韻李公度

餅有儲糧鬢有絲蹉跎歲晚坐書癡輞川畫隱王摩詰
錦里詩窮杜拾遺應舉尚陪新進士主文半是舊相知

春閨看決魚龍陣未必尖椎勝鈍椎

題無盡藏

梁斗南所藏畫

誰開天地祕密歲今古人間用不窮眼底搖光千丈月
耳根傳響一溪風勝游赤壁文章在高卧燕山氣象同
二老風流渺何許後生猶可畫圖中

三第手植瓢材且有詩予亦戲作

為愛胡盧手自裁弱條柔蔓漸繁回素花飄後初成實
碧蔭濃時可數枚試問老禪藤繳去何如游子杖挑來

早知瓠落終無用只合江湖養不才

次韻三弟贈南菴老人

一庵盤礴勝巢仙不入叢林恰是禪花圃蓮塘閒好景
粥盂齋鉢老隨緣忘言已了八千偈適意更揮三兩絃
邂逅我來推不去坐分一半好風煙

次韻劉少宣

旅窗蝶夢曉驚回默數流年祇自哀與世迂踈甘袖手
及身強健且銜盃桐凋翠葉看看盡菊著黃花旋旋開

杖屨南庵訪幽事秋光滿眼送詩來

酬李子遷

曾著朱衣侍冕旒忽乘羸馬出皇州青山有約攜琴往
白髮無成把鏡羞却笑張儀誇舌在不妨巢父有詩留
柳湖莎徑東南夢又見兒童迓細侯

過洧川次侯生君澤韻

誰能孤憤效韓非且喜玄微對鏡機出得山來無遠志
寄將書去有當歸閒居已判平生了真賞從教舉世稀

日咀道腴深有味更須口腹事甘肥

聞菴用少陵韻

唧唧不堪聞村居更惄人青衫傷久客華髮念雙親歲暮那逢雨秋宵未向晨石心猶可轉百感本年真

除夕用少陵韻

臘送迢迢漏燈開艷豔花正愁聞過鴈久客羨栖鴉放眼看春猶好驚心目又斜一簑江上雨歸思浩無涯

即事

卧疾劉公幹躬耕鄭子真溪山留好客天地許閒人花
醉紅沾袖松吟翠繞身撫心無所歎持此壽吾親

宋樓道中

十里羊腸路詰盤過花穿柳幾廻還馬頭忽轉青林角
綠繞人家水一灣

過武丁廟

旱則為霖水則舟若人端合夢中求荆王枕上陽臺雨
板築英雄老死休

戲答侯威卿覓墨

萬松火厄化纈塵
依舊徂徕雪裏春
令劑香螺變一足
破堅分與畫眉人

宮中取張遇墨燒火去膠以之畫眉謂之畫眉墨

北園

碧梧斜影落胡床
白葛烏巾滿意涼
宴坐不知紅日晚
筭輿歸路麥花香

宋內翰九嘉 一一首

九嘉字飛卿夏津人黃裳榜進士乙科歷藍田

高陵扶風三水四縣令皆有能聲入為右警巡
使應奉翰林文字正大中病失音廢居沒於癸
巳之禍嘗有詩云浩歌風露下醉袖拂南山又
題壽安烟霞亭云粧鑿土壁紅千點界畫銀沙
綠一鈞其才藻可畧見矣

途中書事三首

幼稚扶輪婦挽轅連顛翁媼抱諸孫饑民羸卒如流水

掘盡原頭野莽根

又

老禪扶攜訪熟鄉驛塵滿路殣相望終朝拾穗不盈把
只有流民如麥芒

又

攘絲奪麥人爭畧烘日吹風天有年湯餅元非小人腹
蠶絲都作大夫賢

館中納涼書事

涼酒塵纓曠耳醒虛堂窈渺好風清雀知愛子來廻哺

鼠不畏人旁午行每用熟眠酬閒寂端知固有享高明
宦遊非不佳官府奔走塵勞漫一生

東州有感

東城衰草沒黃沙故壘周遭小范衙牧暨那知真老子
龜趺繫馬卧吹笳

搗金明砦作建除體

建牙誓諸將梟鳴軍盡驚除道非戰事銜枚幻奇兵滿
鎧霜日輝行陣寂無聲平旦飛出谷桑棗蔽金明定知

此陳迹中原遮寇城執鞭吾不及范公凜如生破碑字
仍在屬贊卧深荆危襟按其壘信哉天下英成敗翻覆
手狐兔今橫行收復會有時夷吾當請纓開圖睨督亢
按劍逐長鯨閉塞亦已久一揮氣噎清

被檄從軍

不巾不襪柳陰行朝醉南村暮北莊一旦捉將官裏去

直驅盲馬陣中央

即所乘盲馬而言

留別孫俊民姚公茂

草根殘日射離觴。主席風生熱肺腸。此去兜零紅照夜。

輸君吹笛傍糟床。

酴醿菊

酴醿風味醺人醉。著莫東籬愛酒翁。一夜金英全換骨。
冷香晴雪滿秋風。

蓮社圖

野鶩家雞俗好乘虎。溪泉石滿塵埃壯哉砥柱頽波裏。

惟有淵明挽不來。

飛卿不喜佛法自言平生有三恨一恨佛老之說不出於孔氏前二恨辭

學之士多好譯經潤文三恨大才而
政異端淵明挽不來之句蓋自況也

卯酒

臘蟻初浮社甕芻宿醒正渴卯時投醉鄉兀兀陶陶裏
底事形骸底事愁

雷御史淵

三十首

淵字希顏別字季默同知北京路轉運使事思
之季子崇慶二年黃蒙榜進士甲科釋褐涇州
錄事徐州觀察判官召為荆王府文學兼記室

參軍轉應奉翰林文字同知制誥兼國史院編脩官拜監察御史以公事免用宰相侯莘卿薦除太學博士還應奉終於翰林脩撰初在東平東平河朔重兵處也驕將悍卒倚外寇為重自行臺以下皆務為摩拊之希顏蒞官自律者甚嚴出入軍中偃然不為屈不數月閭巷間家有希顏畫像雖大將亦不敢新進書生遇之嘗為戶部高尚書所辟擢遂平縣事時年少氣銳擊

豪右發奸伏一縣畏之稱為神明及以御史巡行河南百姓相傳雷御史至豪猾望風遁去正大庚寅倒迴谷之役希顏上書破朝臣孤注之論引援深切灼然易見而主兵者沮之策為不行至今以顧望為當國者之恨希顏三歲喪父七歲養於諸兄年十四五貧無以為資乃以胄子入國學便能自樹立如成人不二十游公卿間太學諸人莫敢與之齒渡河後學益博文益奇

名益重為人軀幹雄偉髯張口哆顏渥丹眼如
望羊遇不平則疾惡之氣見於顏間或嚼齒大
罵不休雖痛自摧折然猝亦不能變也生平慕
田疇陳元龍之為人而人亦以古人期之故雖
以文章見稱在希顏仍為餘事耳

雲卿父子有宛丘之行作二詩為餞

陽春到上林百卉紛白紅岸谷稍敷腴溪光亦沖融獨
有石間柏不落鼓舞中期君如此木歲晚延清風

又

漢庭議論學傾耳待欹向君家賢父子千載蔚相望讀書二十年閉戶自師匠異端紕偏雜陳言刊猥釀剛全百鍊餘氣出諸老上頽風正波靡去去作隄障

京叔將拜歸於陳徵言為贈老嬾廢學茫無所得獨記其與屏山雲卿襟期所在者非以為詩也梁苑池塘生綠烟吹臺草色春芊芊故人幽扃閉長眠氣槩英英猶眼前陽春無力蘊重泉孝子感時涕泗漣

匍匐歸埽淮陽阡徵予贈別意拳拳我自頑頓須人鑄
安能視後輒子鞭姬情孔思星日懸斡旋萬化中持權
斯文興喪實闢天尋常墨客技藝然醫巫星厯相比肩
何用雕琢空徂年即今海縣謾腥羶獨挽洙泗可洗湔
迺公有志屏山賢二豪在日予牽連傷哉未售墳已顛
老我欲種南山田子之兄弟其周旋事業絕勝空言傳
同裕之欽叔分韻得莫論二字

幼安謝辟命子雲老寂莫趨嚮豈獨異時命非所度我

久困流離一廛求負郭雖無斬敵功尚舉力田爵崧少
啓吾封四履盡伊落有客來問津醉眼入寥廓世事久
閉眼終日只睡昏清風何處來佳客已在門倒屣往從
之玉色向我溫妻孥趣作具歡喜傾瓶益清夜襪被往
共就遺山元嘲謔及俳語發揮間微言懸斷漏天樞高
嘯驚鄰垣脗合政相和意到俄孤騫恨不倒囷廩矧肯
留籬樊弃屬獲珠玉披榛見蘭蓀我肱已三折醉躋偶
全渾知無適俗韻量力任灌園二君清廟器巾冕華罍

尊蒼生望休息朝廷待崇尊出處既異途會合難預論
此樂未易得此夕勿憚煩白酒舉初子黃雞溷諸孫水
樂喧後部山鬟秀前軒一醉萬事休商聲滿乾坤

會善寺松

物生自有常怪特物之病嗟嗟此老蒼怪怪生魁柄侏
儒蹙髀股宿瘤擁腮頸蛇蜒蛟龍戲騰擲痏虎競須髯
喜張礮意氣怒狂迤匠石求棟楹節目足譏評芻蕘急
薪槱堅悍空盼瞪靜言觀倚伏未易相弔慶雖違時世

用顧免斤斧橫陽秋莫榮瘁歲月何究竟盤盤曲則全
挺挺獨也正小草悵埽迹伏神還守性儻隨天中景廣
宇共麻映

玉華山中同裕之分韻送欽叔得歸字

洗耳潁川水療饑西山薇山川得佳客草木生光輝未
路風教薄此道日已微相期千載事非君誰與歸

九日登少室絕頂同裕之分韻得蘿字

閒居愛重九佳人重相過登高酬節物少室鬱嵯峨迤

遷謝塵土夷猶出煙蘿歛如據鼈頭萬壑俯蜂窩浩浩
跨積風彌彌渺長河日車昃紅輪天宇凝蒼波指點數
齊州始覺氣埃多我無倚天劍有淚空滂沱驚鱗盼與
渚倦翼占危柯悔不與家來結茅老巖阿歸途瞻老阮
廣武意如何

月下同飛伯觀畦丁灌園得畦字

村居鄰老圃喘汗憫夏畦轔轔健晚涼月輪轉天蹊荆
荆金融溝涓涓水泮溪黃萎漸蘿息綠潤俄淒迷生意

續夜氣甘滋浹新荑風露觸處香河漢望中低野人無
遠謀且喜豐食鮭雖愧下帷董稍悟養生嵇歸懷自浩
然流光挹平西

濟南珍珠泉

大地萬寶藏玄冥不敢私抉開青玉罅渾渾流珠璣輕
明凝夜光潔白真摩尼風吹忽脫串日射俄生輝有時
如少斲感沸却纍纍風色媚一川老蚌初未知君看一
日間巧歷所不貲遊人隨意滿不界乾沒兒吾謂歷下

城繁華富瑰奇貪夫死專利帝意憐其癡故露連城珍
可玩不可幾若曰天壤間所遇皆汝資何必秘篋苟自
貽伊瑕疵詩成一大笑臆說量天機

讀孔北海傳

漢室風流絕建安老聃父子力排山可怜魯國真男子
也着區區七子間

賦侯相公雲溪

相君襟度本汪洋戲鑿陂池便渺茫解起晴雲作霖雨

更邀明月貯清光千重複嶺藏仙境萬斛香泉釀醉鄉
畢竟麟符拋不得烟波空效五湖蒼

贈陳司諫正叔

洗兵有志挽天河補袞剛留諫諍坡賦出石腸還婉麗
政成鐵面却中和寒侵桃李淒無色雪壓池塘慘不波
急手尊前謀一醉六街塵土涴人多

濟南汎舟水底見山有感而作

南山已在風塵外更恐飛埃涴碧巔一棹晚涼波底看

浴沂面目本天然

洛陽同裕之欽叔賦

日上煙花一片紅崧邙西峙洛川東纔聞候騎傳青蓋
又見牽牛出絳宮事去闕河不橫草秋來陵寢但飛蓬
書生不奈興亡恨斗酒聊澆魂磊骨

啓母石同裕之賦

千古崩崖一罅開強將神怪附郊襟無情頑石猶貽謗

貝錦從為卷伯哀

贈答麻信之序

并

麻弟避兵渡河徑謁裕之於崧

高夤緣一見相與之意甚厚既留數日又將過吾
景玄於女几之陰維元劉國士也而弟遊於其間
則弟之為人可知已臨行復長歌相贈清平豐融
蓋他日未易量也愛養不足詩以誦之

五老英靈未陸沉一枝高秀出詞林珪璋自是清朝器
律呂偏諧治世音此去文章足知已後來功用只齋心
濟時相約元劉了索我雲山深復深

雪

風定雲仍暖天圍四顧低紛紛俄攬野浩浩欲平溪樵
擔歸時重漁舟望處迷饑鴉空繞樹若箇可安棲

宮鴉

萬樹瓊芳鎖漢宮羣鴉容與五雲中曙光先背朝陽日
春信頻呼禁籞風青鬢巧梳欣一色秀眉學畫鬪新工
鳳樓未許啼聲切愁滿長門信未通

洮石硯

緹囊深複有滄洲文石春融翠欲流退筆成丘竟何益
乘時真欲矯吳鈞

馬上見桃花

九衢鞍馬苦塵腥忽見溪桃倦意醒未必施朱便麗俗
最憐滌露出娉婷城東詩老圖幽絕水上仙郎記窈冥
何似玉堂留故事賣花擔上有丹青

叔獻兄歸隱崧山有詩見及依韻奉寄

幾百年一敬通飄飄歸袂振孤風平生自處神明在

衰俗無從議論公韶箭向來儀彩鳳弋繒何苦慕冥鴻
他年杖屨相從處三十六峯雲霧中

劉御史雲卿挽詞二首

氣幹參天擬萬尋聖門梁棟自堪任豸冠岳岳鋒稜峻
鳬鳥翩翩惠愛深可忍佳城玉埋土最哀慈幄血霑襟
傳家賴有雙珠在不爾何如慰士林

又

少同里閈早知音投分交情雨舊今鄉校聯裾春誦學

上庠連榻夜論心
南山松柏愁霜殞
北地乾坤恨日侵
不得生芻躬一奠
西風吹淚滿衣襟

題黃華江臯烟樹二首

疎柳靜茆亭
亭下長江路
不見亭中人
蕭蕭烟景暮

又

江山萬里眼一亭
畧約之黃華
未死在看取
畫中詩

送李執剛致仕歸洛

漕計中興屬老成
引年陳請獨崢嶸
果能辦此公真勇

愛莫留之我愴情塵空忍驚黃鵠舉烟波不負白鷗盟
洛陽去去春如錦畫日神仙看地行

梨花得紅字

雪作肌膚玉作容不將妖艷嫁東風梅魂何物三春在
桃臉真成一笑空雨細無情添寂寞無情亦作淚痕月明有意

助豐融有意助亦云真態更相如病渴妨文賦想像甘寒結小紅

河山形勝圖

高峯巨塹與天連中國關防表裏全北岸塵氛重回首

不如圖上看風煙

次裕之韻兼及玄景弟

名腸相歛半成灰
戰退紛華旆始迴
文字喜逢脩月手
津梁愧乏濟川材
等閒有酒輒共醉
信口哦詩不費才
最憶平生劉子駿
紫芝可惜不偕來

愛詩李道人若愚
崧陽歸隱圖

我家崧前凡再朞
詩僧騷客相追隨
春葩繽紛香澗谷
夏泉噴薄清心脾
霜林置酒曳錦障
雪嶺探梅登玉螭

重陽夜宿太平頂天雞夜半鳴喔整冠東望見石出
金輪湧海光陸離神州赤縣入指顧風埃未靖空噓歛
窮探極覽不知老泉石佳處多留題簡書駢出踏朝市
期會迫窄愁鞭笞襟懷塵土少清夢齒頰荆棘真白癡
叩門剥啄者誰子道人面有熊豹姿披圖二室忽當眼
貫珠編貝多文辭我離山久詩筆退摹寫豈復能清竒
再三要索不忍拒依依但記經行時道人愛山復愛詩
嗜好成癖未易醫山中詩友莫相厭遠勝薰酣聲利乾

沒兒

李右司獻能

二十首

獻能字欽叔河中人年二十一以省元賜第廷試第一人宏詞優等授應奉翰林文字在翰苑凡十年出為鄜州觀察判官用薦者復應奉俄遷脩撰以鎮南軍節度副使充河中經歷正大八年河中陷獨得一船走陝州被召以道梗不能赴就權陝府行省左右司郎中軍變遇禍欽

叔資稟明敏博聞強記輩流中少見其比為人誠實樂易洞見肺腑世間狡猾變詐纖悉無不知然羞之為不道也與人交不立崖岸盃酒相然諾赴難解紛不自顧惜雖小書生以愛兄之道來亦殷勤接納傾筐倒庋無復餘地時輩以此歸之家故饒財盡於貞祐之亂京師冷官食貧口衆無以自資太夫人素豪侈厚於自奉小不如意則有金魚墮地之謹人視之殆不堪其

憂而欽叔處之自若也欽叔文章行業過人處
甚多而天下獨以其純孝為不可及云

贈王飛伯雜言一首

東風吹客衣敗絮逐風飛曉雪沒寒簷無物充朝飢空
簾噴噴號飢鼠饕蟲蠕蠕緣破袴人生豈是犬與雞終
歲區區守門戶游說萬乘苦不早儀秦殆是穿窬盜六
國印千金車滿眼榮華鏡中老孔子聘列國孟軻游齊
梁能令千載後名與日月光男兒生世不虛生死恨身

後無聲名不然鳴玉遊紫京不然著書談六經九日可
射天可補鞭笞百蠻作降虜離騷一篇亦不惡雄筆盤
盤映千古君不見彩鳳翔丹霄一鳴應九韶寸雲起泰
山霖雨滿人間丈夫窮達果在天安用兒女得志相歆
羨失志相悲憐仰天大笑出門去四海今誰魯仲連

夜宿虛皇閣下

倚天青壁截雲霞一水高懸界削瓜不惜玲珑攀石磴
要看絢爛坼雲華玉峯影裏虛皇閣鐵笛聲中祕監家

明日川塗入塵土却應平地幾裏斜

王華谷同希顏裕之分韻得秋字

玉龍落峽噴飛流空翠霏霏晚不收軟脚山堂一壺酒
暮涼閒對兩峯秋

四皓圖

弋繒安足致冥鴻自是薰懷翊贊功謾說壺闕有遺老
望思臺上已秋風

二老雪行圖二首

自笑膠膠擾擾身十年匹馬走紅塵何時雪滿平生屐

太華峯前約故人

又

抱琴衝雪又衝風二老風流阿堵中未似村翁眵抹眼
火爐頭上話年豐

別馮駕之

東風弄微寒吹雪作輕陰春歸未得歸愁攬客子心與
君俱異縣那復重分襟感時復恨別老懷苦難任憶昨

榮陽會燈火語夜深縱談閒徘徊語浩歌雜狂吟相期梁
宋游感君肯相尋西園偶差池市樓成孤甚相逢洧水
湄暫爾成盍簪燕鴻還別去又復如商參我行落日邊
匹馬獨登臨君方無定在倦翼思茂林人堪幾回別老
境各駿駿洧水不西流雙魚定沉沉幸有西飛鴻無客

金玉音

昆陽元夜南寺小集

春皋短短生蘭芽東風嫋嫋吹芳華暗黃着柳小梅素

月姊新年恰十五東皇太一來翩翩竹宮神光祀甘泉
茂陵弓劍沒秋草鳳燈煌煌空自然當年曼衍魚龍舞
回頭昭陽化飛土昆明客舍冷於冰破殿蕭條佛燈古
雪消梁苑想春紅車如流水馬游龍銀餅載酒隨春風
酒酣一嚼百杯空韶華過眼弦上箭人生得酒從歡謳
北斗闌干夜參半耿耿疎星淡河漢

追憶頽亭汎舟寄陽翟諸友

十月冬氣寒清霜瑣羣木輕舟汎頽水微風吹野服信

流不知還石艇橫老玉苔花錦爛斑懸溜珠麗寢頗離
塵市雜倒瀉軒裳俗歲月今幾何春草蔓以綠懷歸劇
飢渴仰羨雙飛鵠矯首九山雲迢迢傷遠目

鄭城秋夜懷李仁卿

日入羣動息暝色陰蒙蒙故人隔頽水嫋嫋生秋風輕
風捲纖雲碧漢磨青銅坐久襟袖涼皎月升天東伊人
如此月霽色羅心胷可望不可親倏已駕飛鴻念此太
虛間心交神自通而況千里月相望寧不同孤光透薄

惟儼如接音容翻翻繞枝鵲唧唧侵階蛩上牀轉不寐
高樓待晨鍾相思夜何永月落秋牀空

題飛伯詩囊飛伯以布為囊采當世名卿詩投其

中

穎露毛錐祇自賢智如樗腹但求全迂疎差似淵才富
羞澀猶無杜老錢收拾珠璣三萬斛貯儲風月一千篇
嘔心大勝奚奴錦要與風人被管絃

送王飛伯歸陽翟

故舊相望似曉星平生懷抱向君傾朱絲不入纂箏耳
彩鳳終儀韶濩聲三楚迢迢動離思九山落落助高情
一廛擬就隆中卧要子同躬壠上耕

西園春日

的礫冰稍出短牆泓澄暖綠靜橫塘娟娟高竹迎人翠
娟娟長紅隔水香病起心情疎酒醕朝來風色妒年芳
只應歸去芸窗晚夢到湘妃錦瑟傍

榮陽古城登覽寄裕之

突兀高臺上，古城登臨人境雨。
崢嶸關河落日歲，雲暮草木臨風氣。
未平虎擲龍拏，王伯事天荒地老。古今情一盃，
欲洗興亡恨，為喚窮途阮步兵。

從獵口號四首

蓮燭金紗簇簇齊，宮槐籠曉尚淒迷。
景陽鍾罷聽殘漏，萬馬銜霜不敢嘶。

又

閭閻傳符啟九關，一聲清蹕駐南山。
虎賁先導三千士，

天馬初離十二閑

又

爛爛龍鱗捧日旂從臣遙認赭紅衣天王清曉親弧矢
初合今冬第一圍

又

的礫金鏡隋曉星晴天霹靂應弦聲風毛雨血燕雲在
未要草間狐兔驚

上清宮梅同座主間間公賦

獻住盧家白玉堂琳宮瀟洒占年芳先生琪樹風霜古
影占銀潢月露涼物外根株本仙種世間紅紫避嚴粧
遨頭詞伯今何遜一笑詩成字字香

丹陽觀竹宮中移賜

素士如林侍紫青紫青新許住蓬瀛娟娟粉節霜勻出
蘋蘋烟梢玉削成福地根莖蒙化育中天雨露借恩榮
綠章封事朝來奏又聽風前彩鳳鳴

王右司渥 一一首

渥字仲澤以字行興定二年進士調管州司候
不赴壽州防禦使邦獻商州防禦使國器武勝
節度庭玉愛其才連辟三府經歷官在軍中凡
十年舉寧陵令未赴丁太夫人憂廬墓三年服
除復授寧陵正大七年朝廷與宋人議和擇可
為行人者仲澤以才選凡再至揚州制司宋人
愛其才有中州豪士之目使還以寧陵課最遷
一官入為尚書省掾三月即授太學助教充樞

密院經歷官八年院廢權右司郎中中牟失利
不知所終仲澤博通經史有文采善談論工書
法妙於琴事詩其專門之學人物楚楚若素宦
於朝吏事則與冀京父相上下其辨博又屏山
所許天下談士三人之一也嘗與予行內鄉山
中馬上賦詩云霜風十月餘千山錦嶂縵又九
日登潁亭見寄云茫茫裏城野歲晏多風埃野
田半已荒草蟲鳴更哀西風吹白雲大隗安在

哉七聖之所迷而我胡為來我本林野人初無
經世材失身鞍馬間坐令雙鬢催安得元紫芝
共舉重陽杯詩成西北望九山鬱崔嵬此詩脫
遺處不復能記憶讀之尚可以見斯人胸懷之

彷彿

仲澤頴上詩不才被棄翻為福拙計無營
却似高是處青山可埋骨誰家白酒不消

憂夕陽轉屋桂林影急雨
壞橋喧水聲人喜傳之

頴亭

三載西湖阻勝遊頴亭聊喜散羈愁九山西絡煙霞去

一水南吞澗壑流賓主唱酬空翠琰干戈橫絕自滄洲
忽忽匹馬從軍去慙愧烟波萬里鷗

有寄

十年鐵馬暗京華客子飄零處處家征鴈久疎河朔信
小梅重見汝南花棲棲活計依簷雀冉冉年光赴壑蛇
舊雨故人應念我不來聯句夜煎茶

寄京父

憶昔相從在寢丘城南城北縱歡遊杏花聯句香隨馬

野水添杯浪拍舟邂逅又成三月別飄零合負一春愁
汝陽淮甸經行遍應有新詩為我留

餐秀軒

秋風幾日搖霜樾秋色南山兩奇絕野人牕戶終日開
要看千秋秦嶺雪層崖深谷相吐吞落日白鹿東南奔
野花雙墮古蘭若樓觀縹渺烟霞昏玉山生玉人不識
草木四時空好色輞川舊與藍橋通細水至今流石室
一川黃葉長安秋望望不見令人愁書生不是濟時具

收得閒身成此遊主人開筵留客醉山雨多情濕征袂
明朝騎馬上七盤回首山家但空翠

遊藍田

甲申之秋月建戌我行商嶺正落木山英似與行子期
撥霧披雲到山腹古潭千丈照錦峯下有蟄龍上棲鵠
高風吹雪已多時熊耳雙尖寒欲縮新乘一水出龍渦
驚見千峰遮木槲南山秀拔北山雄劍戟森然對羣玉
崎嶇直過藍田西始見商山真面目悟真峽口忽中斷

天末脩眉畫濃綠此峽何年得此名曾有金仙構華屋
西巖石室懸細水萬斛瓊珠輸峴谷行人尚說有七盤
瘦馬已愁疲百曲風門放眼望秦川擾擾更嗟塵界跼
去年游騎渡葭蘆萬里橫行如鬼速灞陵原下馬飲血
太華峯頭虎擇肉今年九月未防秋始見登場有新穀
一鞭莫指古招提疎雨有情留客宿主人聞客喜相接
尊酒笑談如昔夙蹇予懶散本真性臨水登山此生足
一行作吏志益違十載從軍雙鬢禿官家後日鑄五兵

便擬買牛耕白鹿

送裕之還嵩山

高懷不受簿書侵清願鷗盟欲重尋老去宦情知我薄
閒來道念見君深對牀夜雨他年夢滿馬西風此日心

嵩頂勝遊誰得共仙聞仙馭待知音

未句用古仙人詩語

古仙人辭今附於此

夢入雲山宮闕幽鸞鷺同侶鴛鳳流桂月竟夜光不
收世俗擾擾成囂秋醉飛星馭鞭金虬八仙浪迹追

真游龜玉峯蹄二十秋摩霄注壑須人求覓劍如或

笑刻舟陽燧非無角綺儔元鼎以來虛崑丘東井徒

勞冠帶脩松食竹飲度蜃樓崧頂坐嘯垂直釣祇應

慙愧劉幽州

知音者無
惜留跡

興定庚辰夏六月望予與元好問趙郡李獻能

同游玉華谷又將歷崧前諸刹因憩於少姨廟

元周行廊廡得古仙人詞於壁間然其首章直

屋漏雨為所漫剥殆不可辨乃磴木石而上拂

拭汎滌迫視者久之始可完讀觀其體則柏梁
事則終始二漢字畫在鍾王之間東井又元鼎
所都幽州必賢宗子虞也夫眷眷不忘幽州者
非吾田疇尚誰歟田復所事之讎却曹瞞之賞
衰俗波蕩中挺挺有烈丈夫風氣其死而不忘
蓋無疑其能道此語亦無疑觀者不應以文體
古今之變而疑仙語也噫仙山靈岳宜有閑衍
博大之真人往來乎其間而世人莫之識也予

三人者乃今見之夫豈偶然哉再拜留跡以附
知音者未渾源雷淵題此詩為仙語無疑然直
謂田疇則似亦未安屏山李純甫題

遊丹霞下院同裕之鼎玉分得留字

霜落豐山白水收歲華全在竹園頭賦詩鞍馬慙真賞
載酒林泉阻勝遊野色自隨人意遠夕陽應為鳥聲留
仙源回首旌旗隔一笛西風喚客愁丹霞下寺土人
以竹園頭名之

驛口橋看白蓮

陰陰喬木障晴暉的的冰蕖照碧漪秋暑困人仍御扇
晚風生竹却添衣百年蓬鬢關心切千里蓴羹與願違
杖屢頻來約他日不妨先築釣漁磯

蒙城縣齋

穀雨連朝沒麥場官糧未入長官忙階庭有雨青蛙鬧
牢戶無人白日長

三門津

層崖摩蒼穹四月號陰風大河三門險神禹萬世功他

山亦崔嵬砥柱獨尊雄雷霆日鬪擊悍暴愁天公劉侯
智有餘始令舟楫通仍餘石上穴飛棧曾連空遙瞻白
玉枝挺植丹灶中仙公去不返此事真冥濛夫人與鼓
崖怪幻尤難窮獨喜兵火餘巋然出新宮當時疏鑿意
四海要會同誰知千歲後築壘防嘯亮詩成一大笑浩
浩洪波東

被檄再至揚州制司驛亭有題詩譏予和事不成
者云來往二年無一事青山也解笑行人因為

解嘲

二年奔走道途間，知被青山笑。往還只向江南南岸老，行人應更笑青山。

冀都事禹錫

二首

禹錫字京父，龍山人。崇慶二年進士。調沉丘簿。與縣令者不相能，及令以贓敗，疑京父發之。乃賂遺權貴，誣京父以賓客依託之事，坐廢十年。朝臣薦其才者積十數人，終為銓曹所礙，居襄。

邑部使者起之攝旁近諸縣所至有父母之愛農司治許昌又為主事區處餽上下千餘里不露聲迹而條畫次第皆具雖鱗雜米鹽若不足經意者問之即應如指諸掌一時吏如康伯祿李欽止諸人多自以為不及也正大中當路諸公極力辨其被誣乃得以常調守扶風丞召補省掾不就歸德奏充知事及城被攻京父為經歷官守禦之策一府倚重之車駕至授左右

司都事兼應奉翰林文字官奴之變家人勸京
父贏服免禍不從人有自外至者京父問賊入
禁中否曰禁中賊滿矣乃自投水中在京師時
希顏仲澤欽叔京父相得甚歡升堂拜親有昆
弟之義而不肖徒以文字之故得幸諸公間希
長予六歲澤長四歲欽與京少予二歲希沒於
正大辛卯之八月年四十八澤沒於明年之七
月年四十七欽沒於其年十一月年四十一歲

京沒於又明年之三年四十二蓋不二三年
而五人者惟不肖在耳今日錄諸君子詩感念
平昔不覺流涕之被面也

僧房

上方樓觀衲衣寒霜後川原眼界寬我是禪房未歸客
阿師休作長官看


贈雷御史兼及松庵馮丈

平生疾惡如風手力振臺綱事所難人道千鈞羞射鼠

我怜衆煦解漂山明時士論知無負晚歲交盟豈易寒
見說嵩前茹芝老白雲倚杖待君還



中州集卷六



總校官庶吉士臣侍朝

校對官庶吉士臣陳文樞

謄錄監生臣周爍